

課文：

就按呢

一步踏入 380 冬前

台窩灣¹的刺桐花

探頭佇熱蘭遮城²的牆仔頂

美麗的擺擺³未赴有身⁴

血已經染紅麻達⁵的胸坎

就按呢

踏入 350 冬前

煎虱目魚的芳味

對灶腳、對巷仔口

對劍獅面頭前

走搨⁶黃昏的記持

嘛應該有 300 冬囉

三寸金蓮 khok-khok-khok

對繡樓躉過半倒的舊厝

嘛有 100 冬囉

Kimono⁷ 內底的金滑⁸幼軟⁹

堅凍¹⁰佇和室的榻榻米

哦，60 冬囉

旗袍將腰肢

倚做古董

台灣衫佇竹篙

無聲無說

巷仔啥攞無講

舊厝啥攞無講

心事共我刺傷

我成做一首鄉愁的詩

佇巷仔底當轉幹¹¹的時

2008/3/15 永康

收錄於《台窩灣擺擺 Tayouan Paipai》